

HAFISKA DOVA U ZAVIDOVIĆIMA



U subotu, 8.10. 2011. godine, poslije podne namaza u Zavidovićima u Čaršijskoj džamiji proučena je hafiska dova za mlade hafize Harisa Ahmića i Fatimu M'Walidi. Svakome tko u srcu ima imalo ljubavi prema Časnom Kur'anu bila je čast biti dijelom predivne atmosfere; na jednom mjestu deseci hafiza, koji su došli podržati svoje mlade kolege, profesori sa Islamskog pedagoškog fakulteta u Zenici, imami, muallimi, zavidovičke džematlije te brojni musafiri iz susjednih gradova i sela. Inače prilično velika Čaršijska džamija u Zavidovićima bila je tog subotnjeg poslijepodneva pretijesna primiti sve zainteresirane posjetitelje. Tom najsvečanijem događaju koji se uopće može organizirati unutar institucija Islamske zajednice prisustvovala je i delegacija Islamske zajednice iz Hrvatske: hafiz Aziz ef. Alili, glavni zagrebački imam, Mevludin ef. Arslani, ravnatelj islamske gimnazije dr. Ahmeda Smajlovića, Mirza ef. Mešić, Alem Orlić, član IOM-a Zagreb i hfz. Amar Mujkanović .

Hafiz Haris Ahmić učenik je Islamske gimnazije dr. Ahmeda Smajlovića i mujezin Zagrebačke džamije, pa smo ga doživjeli kao „našega“ hafiza, iako je rođen u Zavidovićima gdje je položio i hifz pred svojim muhafizom Mustafom ef. Efendićem. A o tom vrijednom i vrsnom muhafizu i muallimu tek će se ako Bog da pisati. Do sada je pred njim spremilo hifz deset mladih hafiza među kojima i Haris Ahmić i Fatima M'Walidi, a desetine ih trenutno priprema, tako da ćemo uskoro imati, ako Bog da, još hafiza iz Zavidovića. Hafiza Fatima ima samo 13 godina. Osim nje, hifz su još prije položili i brat Muhamed te sestra Merjem, a sve troje su redovni učesnici na europskom natjecanju učača Kur'ana koje se održava u Zagrebačkoj džamiji.

Svečanosti hafiske dove prisustvovao je i mr. Muharem ef. Omerdić, rukovodilac vjersko-prosvjetne službe Rijasetu IZ u Bosni i Hercegovini. On je u ime reisa Mustafe ef. Cerića mladim hafizima uručio diplome te održao prigodno predavanje. Hafisku dovu za mlade hafize proučio je hafiz prof. dr. Safvet Halilović, profesor tefsira na Islamskom pedagoškom fakultetu u Zenici. On je ujedno proučio i ikarar dovu za 17 ovogodišnjih hadžija sa područja Medžlisa islamske zajednice Zavidovići. Na kraju svečanosti, osim glavnog zavidovičkog imama Sulejmana ef. Efendića i muhafiza Mustafe ef. Efendića, prisutnima su se obratili i zagrebački glavni imam Aziz ef. Alili i ravnatelj Islamske gimnazije Mevludin ef. Arslani. Obojica su naglasili da smo mi u Islamskoj zajednici u Hrvatskoj ponosni na našega Harisa i da nastojimo ostaloj djeci u mektebu i Islamskoj gimnaziji ukazivati na Harisov primjer, jer ne samo da je dobar hafiz nego je Haris i odličan učenik i vrstan matematičar a drugo mjesto osvojeno na državnom natjecanju iz matematike najbolji je argument takvoj tvrdnji. Čestitamo mladim hafizima i njihovim roditeljima moleći Dragog Allaha da uputi svu našu djecu da budu poput Harisa i Fatime.

M.M.